

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaninqiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti. ² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

Krístunu takastinianitjinia nu

³ Tsawaiشا káshisha Yúsan áujeakun ámin tuke enentáimtusan ti shiir Yúsan yúmiñkiajai. Winia weaqtur túrawarmia nútiksanak Yúsan enentáimtakun ti shiir awajeajai. ⁴ Kanakmiaj nui eantramiam nuna tuke enentáimtajme. Ataksha wararnaisatai tusan ítniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiašha emka Yúsan nekas enentáimtin ármiayi. Amesha núnisketme.

⁶ Tuma asakmin tájame: Yusna takasái tusan winia uwejrun ámin awanteakui Yus kakarman suramsamia nujai atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. ⁸ Ii Uuntri Jesukrístunu etserkatin natsantraip.

Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujai shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu áriniŋ Yus in anenma asa uwemtikramar péñker túratniunam apujtamsaitji. Iisha Jesukristujai tsaniñkiaru asakrin tura Yus nuna túratniun wakerak túramiayi. Yaunchu ju nunka atsaisha in tuke waitnentrampreamiaji. ¹⁰ Tura yamái in Uwemtikkiartin Jesukristu támatai nu anenmamu paant ajasuiti. Niisha jákatniun nupetak emesramiayi. Tura uwempratin chichamjai jáchatai iwiaakman paant awajturmaj.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmiayi. ¹² Túruta asamtaí ti wáitajai. Túrasha Yúsán nekas enentáimta asan natsamatsjai. Imiá kakaram asa amuukatin tsawant jeatsaiñ ashí wínian susamaj nuna ti penker waitruktatui.

¹³ Shiir chichaman jintintiamajmena nuke emetata. Jesukristujai tsaniñkiu asar Yus nekas enentáimtaji tura nujai aneñkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakani in pujurtamaj nuna kakarmarijjai túrata.

¹⁵ Asia nuñkanmayá shuar mash iniaitiusarmai. Nu nekaachmaashum. Nu shuarnumiä Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikrurmai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti. ¹⁷ Rúmanam taasha natsantrutsuk

eatak wáittsuk iniaitiúschamiayi. ¹⁸ Ipisiu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukrístujai tsaníñkiu asam nu kakarmajai kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiawaram chikichnasha jintintiawarat tusam akupkarta.

³ Ame ti penker Jesukrístu suntari asam wáitsatin katsuntrata. ⁴ Suntarka ni uuntri tana nunak umiktin asa chíkch takatan pachintiukchatniuiti. ⁵ Núnisan nakurinchá nakurustinia nujai métek nakurachkuñka nekas péñkeran awakmakun súsatniua nuna achikchamniaiti. ⁶ Ataksha núnisan shuar ajan takaana nu, ashí shuara nañkaamas nuyen yúashtinkiait. ⁷ Wats, ju menaintiu métek-taku chicham áiniawai. Péñker enentáimtakmin ii Uuntri Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu. ⁹ Nuna étserakun sepunam jirujai jinkiamu pujakun wáitajai. Túrasha Yus-Chicham jinkiacminiaiti. ¹⁰ Ashí shuar ni shuarí arti tusa Yus achikiarua nuna yáintajtsan ashí itiurchatan katsunteajai. Nujai Jesukrístujai tsaníñkiaru ásar uwemprar tuke shiir pujusartatui Yusjai.

- 11** Ju imiá nekasaiti:
 Jesukrítstujai jákaitkiurkia Níijiaisha tuke iwiaaku
 pujustatji.
- 12** Wáitiakrishna Niijiai akupkattaji.
 Natsantakrinkia Niisha natsantramprattaji.
- 13** Umichuitkiurniisha Niñkia tuke uminiaiti.
 Warí, Yuska ni enentáimmiajain
 yapajniátsuk tuke umiktiniaiti.

Yusai natsaqaraij tusam ashi túrata

- 14** Shuar jintintiakum ju enentáimtikrata.
 Ii Uuntri Yus íimmianum chichamjai yajauch
 tunaiyaraín tusam chicharkarta. Nu tunaitin
 péñke áantraiti antsu ántuiniana nuna yajauch
 awajenawai. **15** Yus-Chicham tuke enentáimjai
 péñker unuimiátram shiir jintintiawarta.
 Túrakum Yus péñker íírsat tusam péñker takarin
 atá. Túramka Yusai natsaqarchattame. **16** Jú
 nuñkanmayanak ántar áujmatin ainia nujai
 kanaktia. Shuar nuna áujmatainiak tunaanum
 nuna nañkaamas wáiniawai. **17** Ni jintiniamusha
 sunkurjai métek pampaawai. Iminíusha
 tura Piritiusha nu shuar áiniawai. **18** Niisha
 nekas chichaman iniaisar tura ashí Yus-shuar
 nantaktinchá nañkaamasai tuíniakui chíkch
 chíkch shuar Yúsan naka enentáimtuiniatsui
 yamaikia. **19** Túrasha Yus ashí nañkaamas
 enentáimtustinia nuna paant awajsaiti. Júnisaiti:
 "Uunt Yus ni shuarin nékainiawai," tura nuyá "Ashí
 Kristu shuari ainia nu tunaanumiä kanakiarti."
- 20** Kuítrinniu jeen kurijiai najanamusha kuitjai
 najanamusha írunui. Nújainkia ti shiira nu
 takastin áiniawai. Tura numijiai najanamusha
 nuwejai najanamusha írunui. Antsu nújainkia

nekasmiancha ainia nu takastin áiniawai. ²¹ Núniskete Yusa takatríjjai. Ashí tunaanumiä kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntri Jesukristu wakerak péñker takata nui apujtamsamniaitji.

²² Natsá wakerutai iniaisam esetram péñker wekasata. Amesha ashí shuar shiir enentáijiai Yúsan áujena nujai Yus nekas enentáimtakum aneniakum ti shiir pujustá. ²³ Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai. ²⁴ Ií uuntri Jesukristu takarniuka chíkch shuarjai nemasmaikiashtiniaiti, antsu ashí shuarjai péñker nawamnaikiatniuiti. Tura waitnentáimturar péñker jintintiatniuiti. ²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijiai jintintiatniuiti. ²⁶ Nujai íwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tu-naan túrawartatui

¹ Amuukatin tsawant jeakui ti itiurchat átatui. ² Shuar aya niñki enentáimtumasartatui. Kuítian ti wakeriartatui. Nan_kaamantu enentáimtumarartatui. Yúsnasha yajauch chicharsartatui. Aparíncha umirkachartatui. Yuminsatniuncha nékachu ártatui. Ashí Yúsnancha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun

katsuncha ártatui. Aya kajen ártatui. Ashí péñker túrinia nuna nemasri ártatui. ⁴ Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmari “ántraiiti” tuíniak péñker umirkachartatui. Túrasha Yúsan umirua núnisar túrawartatui.

Nu shuar peñké pachisáip. ⁶ Nu shuarsha shiir chichayatan anan̄kawar jeá wáiniawai. Tura nuwá esetar enentáimchan nekas tunaarinniun anan̄kainiawai. Nu nuwá ashí yajauch wakeramujaí anannainiawai. ⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸ Yaunchu Ejiptu nunkanam Muisais uunt akupniujai chichaakui jímiará iwishin, Jánissa Jámprissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintíatniun peñké tujintiainiawai. ⁹ Túrasha nuna nãnkaamas kuakchartatui. Shuar ti paant ni netse túruiniamuriñ nekarawartatui. Núnisan nu jímiará iwishniujaí túrunamiayi.

Amúak Papru Timiutéun akatramiania nu

¹⁰⁻¹¹ Tura ámeka wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anen̄kratkun shiir enentáijiaí katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii

Uuntri uwemtikrurmiayi. ¹² Nekasaiti, shuar Jesukrístujai shiir túrataj tákunka ni nemasri áintiam ti wáitsatniuiti. ¹³ Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjai anañkamu ásar chikichnasha anañkiar weartatui.

¹⁴ Antsu ámeká unuimiam nu imiá nekasaiti tu enentáimtakum tuke emetata. Jintintramawarmia nú shuarsha wáitrichua nu nékame. ¹⁵ Úchichinmayan Yus-Chicham nékame. Yus-Chichamka uwempratniun jintintramamniaiti. Nusha “Jesukristu nekas enentáimtakum uwemprattame” tawai. ¹⁶⁻¹⁷ Ni Papirin áarat tusa Yus ni shuarin áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijai nekamatniuitji. Tura awajiakrincha Yus-Papí núnaka paant jintintramji. Nuyá naka wekasatniun jintintramji.

4

¹ Ii Uuntri Jesukristu amuukatin tsawantai Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha íimiainiamunam juna akateajme.

² Uwempratin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³ Ukunmañka péñker chichaman

nakitrap ii wakeraj núcik nekaatai tusar, shuar teremak péñker pujus chamnia nekapea áintsan, nañkaamas unuimiaru atai tusar, nánkamas unuikiartinian ti untsurí eákartatatu. ⁴ Nekas shiir chichaman iniaisor ikiuiniak ántar áujmatsamun enentáimtusartatui. ⁵ Antsu áme ka tuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

⁶ Ishichik ajasai winia iwiaakmar Yusai surumaktin. Mantamnan nayimpiniam wétin jeatimiai. ⁷ Shuar kakaram maanainia núnisnak tuke kakaram takasmajai. Tséken péñker tsekea áintsanak yawëtsuk takasmajai. Tura Yus-Chichaman nekas akasmatkun péñker wáinkiaitjai. ⁸ Tuma asamtai tawasap nukajai najanamu tsékena susamua áintsan wisha péñker túramunam akinkiaittajai. Tura aya wíniak akirkashtatui. Antsu ashí ni tátinian shiir enentáijiai nákainia nunasha nekas péñkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nunkanmayanak wakerak ajapa ikiuruk Tisarúnika péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. ¹¹ Túrawarmatai aya Rúkas wijiai pujawai. Márkus eaka wáinkiam ame itiartitia. Juí ti penker yainkiamniaiti. ¹² Tura Tíkikiunka Ipisiu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

14 Arejántruka jirujai takawa nu ti yajauch awatjusuiti. Túrutaitkiuisha ni túramujai métek Yus akiktí. **15** Nu amesha péñker wáinkiatá. Ii étserreamun peñké nakitiawai.

16 Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

17 Tura ii Uuntri Jesukristu ni kakarmarin surus yaintkiamiyi. Nujai uwempratin chichaman ashí nuñkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwemtikrurmiayi. **18** Tura núnisan ashí yajauchia nuyá uwemtikrurmatai Nii akupeana nui nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

19 Piriskancha ni áishri Akirancha amikmainiajai. Núnisnak Unisépuru shuarinchá amikmainiajai. **20** Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. **21** Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

22 Ii Uuntri Jesukristu ámijjai tsanin pujustí. Tura Yus ashí péñker waitmakarti.

Nuke atí.

**Yus Papí: Shuarjai Yus Yamaram Chicham
Najanamu
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files

dated 29 Jan 2022

fb10d1f0-e2d5-5d8e-8a74-10846708c857